

Dwngzyen Yungh “Feihyiz + ” Coicaenh Gak Minzczu Samgyau

Gaenh geij bi daeuj, Dwngzyen yungh “feihyiz + ” doidoengh hong minzczu doxgiet baenaj, hawj gak minzczu doenggvaq samgyau couqmaenh gij eiqsik caezcaemh Cunghvaz Minzczu. Seizneix, Dwngzyen miz feihyiz hanghmoeg 67 hangh, ndawde guekgya gaep hangh ndeu, swcigih gaep 8 hangh, si gaep 20 hangh, yienh gaep 38 hangh, cwgoemq daengx yienh 17 aen yanghcin.

Gyalaeg dijhi “feihyiz + gyauyuz”, cuknet gij giekdaej cienziep. Cizgiz doidoengh feihyiz cienziep hwnghat, cuknet gij giekdaej gak cuz ginzcung vwnzva gagsaenq. It dwg doidoengh feihyiz haeuj hagdangz, nab gij hanghmoeg feihyiz lungzsae vwnzva, heiq daengj haeuj gocwngz hagdangz, saedyienh daengx yienh cunghyoz siujyoz “feihyiz vwnzva haeuj hagdangz” 100% cwgoemq, gyagiengz bouxcoz nyezrauh vwnzva nyinhdoengz; ngeih dwg giengzvaq gungganq vunzcaiz, doenggvaq banyenzsiuh bouxcienziep feihyiz, hagdangz giyez lienzhab beizyangj daengj vunqsik, gyahung aen duivuj vunzcaiz feihyiz, seizneix daengx yienh bouxcienziep feihyiz miz 156 vunz. Daezsang gij eiqsik cienziep caeuq baujhoh feihyiz vwnzva gak cuz bouxcoz nyezrauh.

Gya’gvangq lienh “feihyiz + canjnieb”, coicaenh caezcaemh fouqmiz. Gij dinfwngz feihyiz mboujdan dwg vwnzva cienziep, engq dwg gunghcwngz minzswng, doenggvaq cauhamoq yungzhab hwnghat coenghreiz lajmbanj saenqhwngh. It dwg gij doxgaiq feihyiz canjyiezva, doidoengh faenj doengzsim、bingjhaeux Daibingz、dajcang lungzsae daengj feihyiz dinfwngz caeuq canjnieb yungzhab, cauxbaenz diuz lienh canjnieb miz daegsaek, coenghreiz gak cuz ginzcung demsou; ngeih dwg vwnzva lijyouz yungzhab cauhamoq, guh lungzsae doxdax daengj hozdung seiz caez guh ciet gigwn ndei、vwnzva lijyouz daejniemh, dajcauh aen binjbaiz “vwnzva lijyouz yungzhab + gak minzczu samgyau”, doidoengh lijyouz coicaenh gak minzczu samgyau giva lai hwnghat, daezswng gij ginghei gyaciz feihyiz.

Dajcauh binjbaiz “feihyiz + hozdung”, daphwnq gyauhliuz bingzdaiz. Yungh gak cuz ginzcung sihgiuz guh dazyinx, cizgiz daphwnq bingzdaiz vwnzva gyauhliuz baedauq, yungh vwnzva cimqnyinh bae coicaenh minzczu doxgiet. It dwg doxdax coicaenh doxyungz, guh Cungguek lungzsae goenghai doxdax、Cungguek — Dunghmungz gozci ruzlungz doxdax daengj doxdax hung, supyinx gak cuz ginzcung doengzciengz doxdax、caemh yawj vwnzva, Dwngzyen 2024 nienz ndaej bingz “aen yienh nienzdoz ceiq miz diyzuz daegsaek”; ngeih dwg ciengzseiz guh minzsug hozdung, cizgiz guh lungzsae hoh cieng cunzyouz、Dwngzyen caet nyied caet、Dwngzyen heiq niuzgoh canjyienj daengj hozdung, moix bi bingzyaenz guh hozdung daihgaiq 100 ciengz, gyagiengz gak cuz ginzcung nyinhdoengz Cunghvaz vwnzva, coicaenh gak cuz ginzcung samgyau.

Cauhamoq vunqsik “feihyiz + bujfaz”, coenghreiz gihcwngz ceihleix. Damqra loh moq feihyiz caeuq fapceih vwnzva hwnqguh yungzhab hwnghat. It dwg neiyungz heiq cauhamoq bujfaz, baengh ginzcung gyaez heiq niuzgoh naekna, hawj heiq niuzgoh caeuq minzfazdenj、fap baujjang gienzik bouxlaux daengj giethab, yungh vah dangdieg lwnh faplwd cihsiz, gyagiengz gij eiqsik fapceih gak cuz ginzcung; ngeih dwg minzsug hozdung yienhciegz bujfaz, Dwngzyen Daibingz Cin aeu bouqdiemq iq bujfaz “cauzbaiz” — “fap” gau miz daegsaek haenx haeuj caet nyied caet hozdung yienhciegz bae, bang gak cuz ginzcung bouj gij naengzliengh “fapceih”, daezswng gak cuz ginzcung roxnynh ancienz、roxnynh vuenyungz.

(Moz Swgyauj/莫世俊)



▲Lauxsae lwnh gij eiqsik minzczu doxgiet hawj hagseng.

Sanhgyangh:

Couqmaenh Gij Eiqsik Caezcaemh Cunghvaz Minzczu Haeuj Hagdangz

2 nyied 27 hauh, Sanhgyangh Duncuz Swciyen Bahgyangh Cin Cunghsinh Yozyau guh “dangz haihag shwcwng couqmaenh gij eiqsik caezcaemh Cunghvaz Minzczu”, doenggvaq shwcwng gyauyuz, doidoengh bouxcoz nyezrauh Mbanjdung liujgaij minzczu cwngcwz, mboujduenh couqmaenh gij eiqsik caezcaemh Cunghvaz Minzczu. Gaenh geij bi daeuj, Sanhgyangh haeujlaeg saedhengz hong minzczu doxgiet baenaj haeuj hagdangz, caenhreiz gyauyuz dazyinx gak cuz bouxcoz nyezrauh daj iq gaenjmaenh laebhwnj gwzgzgvanh Cunghvaz Minzczu lai yiengh caezcaemh, gyagiengz gyoengq lwngyez “haj aen nyinhdoengz” “seiq aen gagsaenq”, ndaem gij eiqsik caezcaemh Cunghvaz Minzczu youq giz laeg ndaw sim.

(Gunj Yicungh/滚亿忠)

Lungzswng: Lai Cungj Minzsug Angqhoh “Ngeih Nyied Ngeih”

3 nyied 1 hauh, Lungzswng Gak Cuz Swciyen guh ngeih nyied ngeih minzsug vwnzva hozdung cawjdaez dwg “lungz bongh ciudaez ndei • fuk rim lajmbanj”, doenggvaq guh vwnzyi yienjok、lungzsae biujyienj、foux lungz cunzyouz、minzczu diyzuz doxdax、doiq fwen daengj minzsug hozdung, angqhoh ciet conzdungj “ngeih nyied ngeih”.

(Banh Cisiengz/潘志祥)



Vunzmbanj foux lungz cunzyouz gvaq hen z reihnaz.



Vunzmbanj youq gwnz bya mbit caz.

Cauhbingz: Buek Daih’ it Caz Seizcin Haihij Mbit

3 nyied 2 hauh, Cauhbingz Yen Senhveiz Yauzczu Yanh Mbanjsinhcungh Davuj Youjgih Swnghdai Cazyenz ndawde, vunzmbanj cingq mbit caz seizcin. Seizneix mbwn raeuj, gocaz laebdaeb maj nyez moq, boux ndaem caz foenfoen hwnj bya bae mbit buek daih’ it caz seizcin bineix. Cauhbingz Yen daengx yienh ndaem caz 26 fanh lai moux, doenggvaq youjgih nyinhcingq 1.25 fanh moux.

(Vangz Yuzhuz/黄旭胡)